

Date – 05/07/2025  
Time - 7:30 -7:40Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. MzSRLM hnuaia Vantawng Cluster Level Federation, Thenzawl chuan ram puma Federation tha thlanna Atmanirbhar Sangathan Award, 2024-ah Federation tha lawmman pakhatna an dawng.
2. Mizoram Home Guards & Civil Defence (MRHG&CD) review meeting chu nimin khan Home Minister Pu K. Sapdanga hovin neih a ni.
3. Nizan khan Prime Minister Narendra Modia chu Trinidad and Tobago chawimawina sang ber Order of Trinidad and Tobago hlan a ni.
4. Union Home Minister Amit Shah chuan nimin khan fur ruahsur nasatna state Chief Minister te a bia.

<><><>

### MZSRLM

Mizoram State Rural Livelihoods Mission (MzSRLM), Rural Development and Administration Department hnuaia Vantawng Cluster Level Federation (CLF), Thenzawl chuan ram puma Federation tha thlanna Ministry of Rural Development (MoRD) in a buatsaih, Atmanirbhar Sangathan Award, 2024-ah Federation tha lawmman pakhatna an dawng.

He Award dawng tur hian India ram a Cluster Level Federation 33,736 te chu endik niin, phase 4 ah then an ni a, Vantawng CLF te hian North East Region atangin pakhatna hi an dawng a ni. Award hi CLF ten an hnuaia SHG member thingtlanga chengte tana hna an thawh that avanga pek an ni a. Endikna atan hian CLF ten Community Fund an hman tangkai dante, SHG memberte eizawnna atana hma an lak dante, an pawl inrelbawlina felfai dante, line department te nen a convergence an neih dan te, Covid hun laia chhawmdawlina hna an kalpui dan leh a dangte hman a ni.

He Award hian sum fai cheng nuai 3 a keng tel a. Award hi New Delhi-ah Independence Day hman pah in Union RD Minister in CLF Hruaitute kutah a hlan dawn a ni.

Nikum November ni 22 khan MzSRLM hnuaia Tuikum Cluster Level Federation, Chhingchhip te chuan 'Best SHG Federation Award Ceremony, 2024' chu Hyderabad ah an lo dawng tawh bawk a ni.

<><><>

## MZP

MZP President Pu H. Lalthianghlina chuan tun hnaia Samagra hnuaia hna hrang hrang lakah a tling leh thiam, a thawksa leh qualified te aia qualified lo zawk lak an awm nia sawi chu an chhui mek tih a sawi a, Sawrkar hian tun July thla chhung ngei hian he hna lak hi siamtha a, a thiam leh tling zawk an awm chuan la tha leh vek turin sorkar an ngen tih a sawi a ni..

Nimina MZP in I&PR Auditorium Aizawl-a Under Graduate result 2025 a Gold Medalist-te chawimawina hun an hmanna-ah a sawi a, hemi chungchangah hian Minister nen pawh sawi dun tawhin, Minister te chuan fair taka kalpui-a inrawlh loh an duh laiin ahnuailam te'n an lo ti buai leh thin niin a sawi a, Minister te hi inrawlh zawk se, endika, chhuichiang turin an duh a ni a ti.

He inkhawm hmanpuitu Lok Sabha MP Pu Richard Vanlalthmangaiha'n tunhnaia Central Service exam ah Mizo inziak tling an awm theilo chu pawl atih thu sawiin zirlaite tan chona nasa tak anih thu a sawi.

MP chuan Central Service ah Mizo an inziak tlinna chu a rei tawh hle tih sawiin tun hnuah inziak tling an awm theilo chu a pawl atih thu sawiin tuna zirlai mek te tan chona nasa tak ani a ti a, theihtawp chhuaha Mizo ti hming tha tu ni thei tura tan la theuh turin a chah a ni.

Pu Richard-a chuan Mizoram chu a la thianghlim tih sawiin rilru thinghlim tak nei an nih thu a sawi a, Mizoram hmakhua leh kaihraina kawngah thinghlim taka a kal theih nan tuna zirlaite an pawimawh tih sawiin an hlawhtlinna chu Mizo pumpui hlawhtlinna a nih thu a sawi baw.



## MIZORAM HOME GUARDS

Mizoram Home Guards & Civil Defence (MRHG&CD) review meeting chu nimin khan Home Minister Pu K. Sapdanga hovin neih a ni a,

Minister Pu K. Sapdanga chuan Mizoram Home Guard leh Civil Defence-a volunteer-te chu ram leh mipui tana hna pawimawh tak tak thawktu an nih thu sawiin, sawrkar hmun pawimawh vengtu, khuarel chhiat nikhuuaa chhanchhuah leh chhawmdawl hna thawktu an nih bakah dan kenkawh kawnga police tanpuitu an nih thu a sawi a. MRHG&CD dinhmun chawisan a nih theih nan leh politics inrawlh lova hna lak a nih theih nan hna lak dan felfai zawk siam a tul thu sawiin, volunteer hna dilte tan hna dilna standard form siana open advertisement tih chhuah ni se, educational qualification pawh tihsan ni thei se a duh thu a sawi baw.

Home Minister chuan MRHG&CD volunteer-te retirement benefit nei lova an awm reng chu veiawm a tih thu sawiin, Mizoram Provisional Employee Savings Scheme 2024-ah an tel theih dan tur ngaihtuah a tul thu a sawi a. MRHG&CD-a volunteer-te chu ral do tura ngaih ni lo mah se ralthuam pek an nih thu leh a tul chuan ral do tura inring tur an nih thu sawiin, mi tha leh rintlak ngeite laka tuai hriam leh training tha tak pek an ngaih thu a sawi a ni.

Home Secretary Pu Vanlalmawia pawhin thu sawiin, civil defence inralrinna tih that a ngaih thute, MRHG&CD hna chanpual tih chian lehzual a tul thute a sawi a. Khawvel hmasawn leh changkang chho zel mila uniformed service-te pawhin tunlai thiamna hman tangkai dan an zir thar ve zel a pawimawh thu a sawi bawk.

<><><>

MPCC

Mizoram Pradesh Congress Committee chuan 'India Danpui Humhimna leh Mizoram Mipui Thlavang Hauhna' hun Aizawl Vanapa Hall kawt-ah nimin khan an hmang a, Bhavan thleng kawng an zawh bawk a ni.

He hun MPCC Treasurer Dr. Lalmalsawma Nghaka kaihhruaiah hian PAC Member, Pu John Siamkunga chuan BJP in Indira Gandhi hova Emergency an puang kha India Constitution thahna ni 'Samvidhan Hatya Diwas' tiin an kova, India ram chu Socialist pattern in a kal a, Socialist pattern a a kal vangin ni za inhlawhna te, food security thlengin an dawn phah a. Sakhaw tihbik nei lo Secular ram ah sakhua theuh zalen takin a biak theih a ni a ti a.

CAA te siamthat phalloh pawh BJP chuan a siamtha lui a, Christian te pheih chu foreign sakhua an ti a, Muslim pawh an telh duh lo a, ti hian zawi zawiin Kristian te an nekchep reng anga, an duh chu engtikah emaw chuan an ti dawn tho tho a ni a ti.

Pu John Siamkunga chuan ZPM pawhin engtikah emaw BJP zawm hun an la nei dawn tho a ti a ni.

PAC Member Pu John Rotluangliana chuan ZPM sorkar in BJP a la zawm loh chhan chu mipui an la zah vang a ni a ti a. Inthlan hma khan BJP sum tamtak an dawng tia sawi a awm a, inthlan hma lawkah khan sum an ngah thut a ni a ti. ZPM sorkar chuan chhiah tihsan theih zawng zawng an ti sang ni a sawiin, Sahuana zawngte en man thlengin an ti sang a ni a ti.

Pu TT Zothansanga pawhin thu sawiin, Mizoram chhung a sawhthing thar beisei zat Assembly House a zawhna Minister in a chhan dan chuan quintal nuai 14 leh sing 8 thar anih beisei thu tarlan a ni a. Kumin a sawhthing lei zat hi quintal nuai 2 sing 3 vel a ni a, Mizoram sawhthing thar a tanga sawrkar sawhthing leizat hi zaa 15 vel a ni, a ti.

Sawhthing an lei zo vek an tih laiin khaw li khaw nga an leisak a, Youtuber an kova, media ah lei zo vek angin an insawi a ni a ti bawk a ni.

<><><>

BJP

BJP Mizoram Political Session nimina Aizawla neihah BJP State President Dr K Beichhua chuan mi thenkhat BJP sawichhia a, Christian te tiduhdahtu anga sawitu tam zawk chu an rilru ngaihtuahna chu Silchar pawh la thleng lo te anni thin a ti.

Pu Beichhua chuan a hmalakna leh a tum ber tur chu Party mite inlungrealna leh hmangaihna a thawh ho na atanga hna thawh a ni a ti a, MLA Pu K Hrahmo leh Pu Vanlalthmuaka BJP State President kal chhuak ta leh a Team te fakin, BJP Mizoram in Pu Vanlalthmuaka leh a team te hmalakna azarah Mizoram ah khaw 300 chuang ah Village Council ah Sorkar na an nei a, ADC area ah pawh Sorkarna an siam thei bawk a, chumai nilovin, a kaihhruaina hnuaiah BJP in MLA pahnih an nei thei a ni a ti.

Pu K Hrahmo pawhin thusawiin kum 2028 MLA General Election lo awm tur ah chuan Mizoram ah BJP in Sorkarna an siam theih ngei a beisei awm tawh a ti a, BJP Member ten theih tawp an chhuah angai a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MISSION SHAKTI

Directorate of Women & Child Development (WCD) State Hub for Empowerment of Women (SHEW), -in Mission Shakti hnuaia hmalakna kal zela a buatsaih, kum tling lova inneih khapna dan , Prohibition of Child Marriage Act, 2006 chungchang inhrilhhriatna neih a ni a, Mizoram State Legal Services Authority (MSLSA) Member Secretary Pu Vincent Lalrokiman a hmanpui.

Women & Child Development Director Pi Zoramthangi Chhangte chuan ramchhung hmun danga ‘child marriage’ an tih ang tak hi Mizo-te zingah awm lo mah se kum tling lova inneih hi he dan hian a huam tel tih leh naupangte chanvo bawhchhiatna lian tak a nih thu a sawi a. Hetiang kaihhnawih thubuaite chu a hun taka bawhzui a tul thu leh thawhhona tha neih a pawimawh thu a sawi bawk a ni.

Women and Child Development Department chuan sawrkar laipui bultum, Bal Vivah Mukta Bharat-Child Marriage Free India Campaign hi November ni 27, 2024 atang khan a kalpui a. Hmeichhia kum 18 an tlin hma leh mipa kum 21 an tlin hmaa inneihtir an nih loh nan hma an la mek a ni.

India ram hmun tam takah naupang kum tling lo inneihtir a la hluar hle a, Mizoramah erawh chuan tihluihna ni lovin nau an pai avang te, an inruk avangte leh inngaihzawnnain a hrin chhuah thil dang hrang hrang avangtein nu leh pa/chhungten an suihrem a, man leh mual an inhlan leh mai thin a. Hei hi khawtlang nunah suala ngaih em em ni lo mah se thil tha lo, naupangte hmakhua tichhetu a nih mai bakah dan mithmuhah thil sual a nih avangin fimkhur a ngaih thu he hunah hian tarlan a ni.

Naupangin a hun hmaa nupui/pasal an neih hian an zirna, hriselna, eizawnna, ngaihtuahnate nasa takin a nghawng a, an theihna leh an thlen chinte tithuanawpin hmakhaw eng tak nei turte nun a tichhia a, nu leh pa, chhungte leh khawtlang mipuiten hetiang inneihna thleng lo tura venpuina kawngah mawhphurhna pawimawh tak an neih thu sawi a ni.

Hetiang thil thleng hria emaw hmutu chuan Child Helpline Tollfree Number 1098-ah emaw, Women Helpline Tollfree Number 181-ah emaw, Child Marriage Prohibition Officer District & Block tina WCD office-ah te, Village Council Secretary leh Community Watch Group hrang hrangte hnenah a thlen theih reng a ni.

<><><>

PM

Nizan khan Prime Minister Narendra Modia chu Trinidad and Tobago chawimawina sang ber Order of Trinidad and Tobago hlan a ni. PM Modia hi Trinidad & Tobago President Christine Carla Kangalooi'n a hlan a. Thusawiin Pu Modia chuan a chawimawina dawn chu India mi vaibelchhe 140 chuangte aiawha dawng anih thu a sawi a ni.

Prime Minister Narendra Modia hian Trinidad and Tobago-a cheng India mi chhuan 6 na te chu Overseas Citizen of India (OCI) card pek an ni tawh dawn tih a sawi . PM Modia chuan Trinidad-a piang leh seilian India mite chu an thlahtute ram India rawn tlawh tur leh inpawhna thuk zawk rawn nei turin a sawm a.

Trinidad and Tobago chu Caribbean ram zingah UPI hmang hmasa ber an ni chu a lamwpui thu a sawi a. He UPI hian Trinidan and Tobago chauh niloin India tan pawh hlawkna tam tak a thlen dawn a ni a ti bawk.

Prime Minister Modia hian Trinidad and Tobago chawimawina sang he Order of Trinidad and Tobago' hlan anih tur thu Prime Minister Kamla Persad-Bissessar chuan a sawi a ni.

Nizan vek khan Prime Minister Modia hain Argentina tlawh turin a zinchhuak lehngal a. Argentina President Javier Milei sawmna avanga Argentina hi tlawh tur a ni a. A cham chhungin eibar zawna leh thildanga thawhdunna pawimawh tak takte a sawipui ang.

<><><>

MONSOON

Union Home Minister Amit Shah chuan nimin khan fur ruahsur nasatna state Chief Minister te a bia. Heng state te hi Gujarat, Himachal Pradesh, Rajasthan, Uttarakhand leh

Chhatisgarh te an ni a. Social Media lama a tarlan danini Pu Shaha chuan mipuite mamawhna ang zelin NDRF team te tirhluk an ni tih sawiin a tul dan ang zela chhawmdawlna pek belh anih tur thu a sawi a. Sawrkar laipui chuan theihtawpin a tanpui zel dawn tih heng state Chief Minister te hi a hrilh a ni.

Ramchhung hmar thlang lamah fur ruahtui a tlak tam avangin IMD chuan mipuite inralring tura hriattirna a ti chhuak a. July ni 5 atanga ni 8 chhungin Ruahpui vanawn, tek leh thli thawk thei reng anih thu India Meteorological Department chuan a sawi a. Furpui tuar nasa ber Himachal Pradesh ah chuan ruahsur nasa avanga chhiatna thlengah mi 69 an thi tawh a, mi 37 chin hriatlohin an bo.

<><><>